



Penyelidik dan pakar rujuk yang terlibat di dalam Bengkel Penyelidikan Sekolah Rimba di UPSI, Tanjung Malim, Perak baru-baru.

Sekolah Rimba untuk orang asli

TANJUNG MALIM - Universiti Pendidikan Sultan Idris (UPSI) berhasrat membangunkan Sekolah Rimba untuk murid orang asli melalui pembiayaan Skim Geran Penyelidikan Fundamental (FRGS) Kementerian Pendidikan.

Pensyarah Kanan Fakulti Pembangunan Manusia UPSI, Dr Norwaliza Abdul Wahab berkata, Sekolah Rimba merupakan satu bentuk pembelajaran luar bilik darjah menggunakan hutan dan sumbernya sebagai lokasi dan bahan pembelajaran.

Menurutnya, Sekolah Rimba sudah diamalkan di luar negara seperti Sweden untuk masyarakat minoriti membina keyakinan diri serta pengetahuan peribumi masyarakat setempat.

“Secara ekstrinsik, konsep Sekolah Rimba membolehkan murid belajar

mengenai flora, fauna dan interaksi antara organisma dalam kehidupan,” katanya dalam satu kenyataan kepada *Sinar Harian*.

Sementara itu, Pengerusi Jawatankuasa Matlamat Pembangunan Lestari (SDGs) Fakulti Sains Kemanusiaan UPSI, Profesor Madya Dr Mohd Hairy Ibrahim berkata, Sekolah Rimba berperanan menggerakkan usaha pemuliharaan alam sekitar yang menyokong usaha Suruhanjaya Terhadap Alam Sekitar dan Pembangunan Dunia (WCED).

Menurutnya, konsep Sekolah Rimba mengandungi aktiviti menyeronokkan seperti membuat kraftangan daripada sumber hutan, mempelajari mengenai haiwan dan tumbuhan serta meneroka hutan.